



15. april 2010

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

**Apeqqut: Sooq Naalakkersuisut Halibut Greenland A/S qaleralinnut tunitsiviliinissamik itigartippaat?**

(Inatsisartuni ilaasortat Finn Karlsen, Siverth K. Heilmann, Knud Kristiansen, ATASSUT)

**Tunngavilersuut:**

ATASSUT-mit akuersaarsinnaanngilluinnakkatsinnik Naalakkersuisut ataqatigiissaagaarpassittumik aalisarnermik inuussutissarsiuteqarnermik ingerlataqartunik nungusaanissamik siunertaqarlutik sulinerat Naalakkersuisut sulilermatali ersersinneqartuarpoq.

ATASSUT aamma Siumut Naalakkersuisooqatigiikkallarmata aalisarnermik ingerlataqartut atugaasa pitsanngorsaaviginiarneqarnerat ullumikkut Naalakkersuisuusunit pasillerneqartarpugut ikinngutigunngooq parteeqatigullugooq pisassanik tuniorartarsimagigut taamatuttaaq tunitsivinnik umiarsuarnik qinnuteqartartunut akuersissutinik agguaassisarsimasugut kammalaasersorneragaalluta.

Aalisarnermut Piniarnermut Nunalerinermullu maannakkut Naalakkersuisuusup inuiaqatigiinnut sunniiniarnermini tunngavilersuutiginiartarpaa Halibut Greenland A/S-imut tunitsivimmik umiarsualiinissamik akuersissutinik tunniussisoqartarsimasoq kammalaatersorluni.

Taamatut pasilliineq minnerpaamilluunniit pissutissaqanngitsoq Naalakkersuisup pineqartup suliat qanoq ingerlanneqartarsimaneridik uppersaatinik tigumminnittup taamatut pasilliisarnini tunuattittariaqarpaa allaallu utoqqatserariaqaraluarpoq.

ATASSUT-mit upperigatsigu nunarsuarmi qaleralinnik piumanerup annertunera milliartulernaviangitsoq qaleralinniarnep siuarsaavigineqarnissaa siunertaralugu aammalu aalisartut tunitsivissaqartuarnissaat siunertaralugu kisermaassisutut ilusilimmik ingerlatsisoqarsimanagera kipitinniarsimavarput, ilaatigut Halibut Greenland A/S-imut qaleralinnik tigoqqaasussanik umiarsualiiumammat.

Taamatut iliorneq avammut nioqqutissiornitsinnut iluaqutaaginnarani aammali nunatsinni aalisartorpassuarnut iluaqutissiinikuuvoq, tassami ingerlatseqatigiiffiup taassuma akigititai aalisartunut assut iluaqutaasimapput, taamaalillutillu aalisartut inuussutissarsiumminnik siuarsaasinnaanissaminnut periarfissaat annertusarneqarsimalluni.

Taamaammat ATASSUT-mit paasigatsigu Halibut Greenland A/S-ip umiarsualiiniarluni qinnuteqaataa itigartinneqarsimasooq assut pakatsivugut, taamaalillutimmi Naalakkersuisut aqutissiuuppaat aalisartut akiluttorfigineqarlutik ingerlaannassasut, kiffaangissuseqarlutik iluarinerusaminnut tunisisinnaatitaassangitsut taamaalillutillu aningaasarsiornikkut siuarsarnissaminnut periarfissinneqassangitsut!

Kanngunaqaaq aamma akuersarneqarsinnaangilaq inuiaqatigiit inuussutissarsiornikkut aammalu aningaasarsiornikkut siuarsarneqarnissaat aammalu immitsinnut pilersornerulernissarput pillugit suliniutit Naalakkersuisut akerlilersorlugit ingerlammata, pisummi matuma ersersippaa Naalakkersuisut siunertarigaat aalisartut nukillaarsarneqassasut inerisaanissaminnullu periarfissaajarneqassasut. Tamanna piaarnerpaamik mumisinneqartariaqarpoq.

Apeqquitsinnut uunga ilanngullugit nassiuppagut assit ullualunnguit matuma siorna, tassa 13. april 2010 Innaarsunni aammalu Tasiusami assilineqarsimasut immi oqaluttuartut! Assit uppersaasut qaleralinnik tigoqqaaviit amigarujuussuaraluartut Naalakkersuisut iliuuseqarumanginnerinnaasigut qalerallit tonserpassuit kusanarluinnaraluartut eqqaannarneqartariaqarsimasut!

Ajorpoq ajorluinnarpoq taamak soqutigittaatsigaluni Naalakkersuinikkut ingerlatsisoqarnera akuersaaginnarneqassapat taamaammat Naalakkersuisut sammivitsik allangorluinnartariaqarpat aalisarnermillu inuussutissarsiornep siuarsaavigineqarnissaa pimoorullugu sulisariaqalerput!

Allatut ajornaqaaq, pakatsineq angingaarmat ATASSUT-mit misigisimavugut pinngitsaalineqarluta Naalakkersuisut sakkortunerpaamik avoqqaarisariaqarlugit taamaaliunngikkutta aalisarnermik sequtserisutut inissisimaannarnissaat aarleqqutigisariaqarmat.

Oqaasissarpassuaqarnaraluartoq taamatut tunngavilersuuteqarluta ATASSUT-mit paaserusupparput sooq Naalakkersuisut Halibut Greenland A/S qaleralinnut tunitsiviliinissamik itigartitsisimanersut?

Inussiarnersumik inuulluaqqusilluta

ATASSUT sinnerlugu Inatsisartuni ilaasortat